

Higher Gaelic (Learners) – Listening – Learning

Rebecca talks about her experience of learning a language.

Aig toiseach na bliadhna, seach gu bheil bliadhna ùr ann, bidh daoine tric a' cur rudan romhpa a dhèanamh tron bhliadhna. Rudan leithid cuideam a chall, no sgrùdadh a smocadh. Mar as trice, cha bhi mi fhèin a' dèanamh a leithid uair sam bith. Tha mi dhen bheachd gur e gòraiche a th' ann agus gu bheil e gun fheum leis nach bi a' mhòr-chuid de dhaoine a' cumail orra leis na gheallaidh a dhèanamh airson barrachd na seachdain no dhà, aig a' char as fhaide. Ach, tha am-bliadhna diofraichte. Chuir mi romham gun ionnsaichinn cànan ùr.

Bha mi an dùil agus an dòchas gum biodh e an ìre mhath furasta. Nach eil dà chànan agam mar-thà? Beurla agus Gàidhlig agus nach eil dà-chànanas na rud mìorbhaileach, a' fàgail gu bheil sinne aig a bheil còrr air aon chànan nas comasaiche ann an iomadach dòigh?

B' e a' chiad cheist a bh' orm dè an cànan a bha mi airson ionnsachadh? Bha beagan Gearmailtis agam bhon sgoil, ach cha do chòrd sin rium. Smaoinich mi gur dòcha gum biodh Fraingis a' freagairt orm nas fheàrr. 'S e an dàrna ceum taghadh an dòigh anns an robh mi ag iarraidh ionnsachadh.

An toiseach, mar a tha na chleachdadh aig daoine san latha an-diugh, chaidh mi gu bùth nan *app* air a' fòn agam. Bha an t-uabhas chùrsaichean an sin airson Fraingis ionnsachadh. Thug mi a-nuas am fear aig an robh na molaidhean a b' fheàrr – ma bha e feumail do dhaoine eile, nach eil fhios gum biodh e feumail dhòmhsa cuideachd?

Uill, 's e bha math. Gach latha, nuair a bhithinn a' coiseachd gu m' obair no nuair a bhithinn dìreach aig an taigh, b' urrainn dhomh an *app* a chleachdadh airson èisteachd ri cuideigin ag ràdh faclan agus abairtean Fraingis. Bhiodh an cothrom agamsa an uair sin feuchainn ri an ràdh às an dèidh agus bhithinn

Bitesize

a' faighinn comharra a-mach à deich agus stiùireadh mu dheidhinn dè cho math (no cho dona!) 's a bha am fuaimneachadh agam. Cha b' fhada gum b' urrainn dhomh 'balach', 'nighean', 'ubhal', 'uisge', 'siùcar' agus iomadach facal eile a ràdh ann am Fraingis.

A dh'aindeoin 's gun robh mi gu dìcheallach a' cleachdadh an *app* a h-uile latha, feumaidh mi a ràdh nach do rinn mi mòran adhartais! Cha robh mi ga thuigsinn idir. Bha dùil agam gum biodh seo furasta! Chaidh mi a dh'iarraidh comhairle bho thidsear nuadh-chànan air an robh mi eòlach.

Uill, feumaidh mi aideachadh gun tug i dhomh a' chomhairle a b' fheàrr a fhuair mi a-riamh. Mhol i gum bu chòir dhomh feuchainn ris a' chànan a bhruidhinn cho tric agus a b' urrainn dhomh agus èisteachd ri prògraman telebhisean agus rèidio ann am Fraingis feuch an togainn abairtean ùra agus blas math Frangach.

Ach, am pìos comhairle a b' fheàrr a thug i dhomh, 's e gum bu chòir dhomh a dhol dhan Fhraing air làithean-saora feuch am bithinn air mo bhogadh sa chànan. Nam bithinn san Fhraing – dh'fheumainn Fraingis a bhruidhinn! Saoilidh mi gur fheàrr dhomh mo mhàlad a lìonadh agus feuchainn air a' phort-adhair – au revoir!